











A D

CLEMENTEM XII.

P O N T. M A X.

I N F U N E R E

FRIDERICI AUGUSTI

S A X O N I C I

P O L O N I Æ R E G I S

S. R. ꝑ. E L E C T O R I S

O R A T I O

*Habita in Quirinali Sacello*

AB ÆNEA SYLVIO PICCOLOMINEO

*Basilicæ Liberianæ Canonico, & a Pontificio ad  
honorem Cubiculo.*



# AD CLEMENTEM XII.

PONT. MAX.

ÆNEAS SYLVIUS PICCOLOMINEUS.



*Q*UAM sit præclarè institutum P. B., ut magnis Regibus, qui & Ecclesiæ rem auxerint, suamve & voluntatem & fidem huic Sanctæ Sedis probaverint, vitâ functis, in Urbe Roma laudatis publicè honoratisque, jûsta solvantur, onus profectò maximum recepisse in me sentio, verba faciendi de FRIDERICO AUGUSTO, Polonorum Rege magnanimo, cui de Christiana Republica optimè me-

*rito Christianorum communi nomine  
a Te Pontifice Maximo parentatum.  
Sed ubi magna se virtus offerat, non  
arte, non eloquentiâ opus est; sim-  
plex inconditumque dicendi genus,  
quod minimè suspiciosum, accommo-  
datius videtur AUGUSTI laudibus  
exprimendis: Accipias igitur Ora-  
tionem Tu meam qualemcumque  
typis excusam, & quòd animum ad  
scribendum appulerim Te jubente,  
& quòd dixerim coràm Te, tuum illi  
nomen adscriptum sinas, ut auspi-  
catiùs, & tuo periculo, ut ita di-  
cam, in lucem publicam se commit-  
tat. Illud ego precabor a Deo, ut  
qui maximum in Imperium Te mi-  
sit, parem temporibus animi magni-  
tudinem afferentem, faxit, neu pa-  
rem cœptis atque virtuti desideres in  
Repub. administranda felicitatem.*





*Hieronymus Rori inv. del. et sculp.*



N ea tristitiæ atque luctus acerbitate , in quam incidimus desiderio magnanimi ac præclarissimi Augusti Regis , inopinatâ morte Nobis erepti , erepti Saxonum Genti , amplissimo Poloniæ Regno , & Ecclesiæ magna de illo speranti , valebit fortassè magis ad acuendum , quàm ad extenuandum dolorem laudatio , quam tamen , cum ipsa virtus officium quasi supremum expostulet , & Nos præcipuè debeamus tam bene de Nobis merito Regi , eam habiturus , in copia laudum , quæ tantæ tamque diversæ succurrunt , ut potius , quid præterire silentio possim , quàm quid proferre , sollicitus esse debeam , illud existimavi præstandum , ne quidquam excidat mihi , quod etsi magnum , etsi admirabile , tamen & hoc Pontifice Maximo , & tam augustâ Concione , vel minùs dignum , vel ad hanc loci Sanctissimi Majestatem , vel ad hanc Funeris Religionem , non satis accommodatum videri possit . Vereretur etiam , ne malè per me consultum Augusti laudibus videretur , si ego illarum , ut est in more institutoque Oratorum , exordium ducerem a nobilissima , quâ profectus est , Gente , cujus capita & conditores in vetustatis caligine nusquam apparent , nisi cum potestate & imperio , quorum præclara posteritas acceptam gloriam a Patribus nostra usque in tempora propagavit , & tot in stirpes atque familias diducta , quandam sibi videtur , ut ita dicam , immortalitatem adstruere . Quapropter non ego

(VI.)

quidquam proferam Vobis de Witikindo Saxonum Duce fortissimo, & Regiæ Stirpis authore, quo uno Carolus Magnus in retundendo, perdomandoque, diutiùs adlaboravit, quàm, vel in reliqua submittenda Germania, vel in Italia pacanda, neque ad commendationem Augusti quidquam desumam, præter avitam gloriam Christianæ Religionis ab illo primùm in generosam Domum illatæ. Silentio tot ornamenta, tot Gentis decora præteribo, silentio tot bellatores egregios, qui propriis finibus crumpentes, Germaniâ peragratâ atque emensâ, & Oceanum prætervecti, peregrina Regna fundarunt. Non illos honoris causâ nominabo, qui vel Imperio potiti, vel tanto rerum fastigio digni sunt habiti, quorum unus & alter eâ magnitudine animi præstiterunt, ut recusaverint a Germaniæ Septemviris dignitatem Imperatoriam ad illos ultrò delatam. Nullam denique Augusto Regi laudem adsciscam, cujus in societatem se offerat vel fortuna, vel casus, nullam de eo, nisi propriam, nisi Regiam, nisi Christianam virtutem commemorabo, nisi quæ multùm ad gloriam nominis valeat, multùm ad conjecturam beatæ immortalitatis, ut Religionis est credere, ab illo adeptæ.

Quoties Augusti præclaram sanè & Regalem institutionem omnibus ad virtutem præfidiis atque ornamentis munitam, quoties adolescentiam recorder haud insolentem laborum, haud otio languidam, sed in palæstra atque in acie obfirmatam, & gloriæ cupidam atque appetentem, non possum non commoveri, non ferre graviter, quòd ea in illo virtutis indoles tantis erroribus obrueretur, atque in sanctissimæ Religionis obversaretur ignorance. Occurrit illicò mihi imago calamitosæ pestis illius, quæ primùm se Wirtembergii in lucem effudit, quæ parva licet, & contemnenda principiis, nescio quo nostro fato immensas adeò vires atque alimenta collegit, ut citò Provinciæ fines egressa, longè latèque exultarit, & pervagata Germanias, & superato Alpium vallo, Italiæ oras attingere non sit verita. Tua verò inter cæteras crudelis & miseranda conditio videtur

detur mihi præclara Saxonum Gens, quæ Germanorum cultissima, & pacis & belli artibus ac disciplinâ ita florens, ut rerum gestarum gloriâ, ut opulentiâ, nulli concedas, industriâ paucis, quòd cum ea in Te vis ingeniorum, ea doctrinæ sit laus, Te aliquandò respiciens, ad sanitatem non redeas, istamque mentem & obsoletam superstitionem non exuas. Quanquàm est nemo vestrûm, ut arbitror, aut ita mente obcæcatus, aut tanto contra Nos odio inflammatus, qui non interdum se colligat, qui veritatem, a qua descivit, non recognoscat. Est, est in animis omnium, accensa semper & flagrans, quædam de Cælo hausta lux, quam si consulere, in quam si cernere atque intueri velimus, profectò, veluti ex improvîso solis adspectu expergiscimur, ita ab errore liberaremur. Sensit excelsus ille & ad veritatem formatus Augusti animus, & agitare consilia cœpit, perdendi prorsus abjiciendique pravæ atque deformes de Religione opiniones, quas puerilibus annis imbiberat. Aversabatur nimirum egregia Principis indoles doctrinarum perverfitatem atque inconstantiam, & suspiciosa erat illi in summa superstitione summa peccandi licentia, atque, ut audiui, inter alia demirabatur, potestatem Sacrorum ad Regni jura traductam. Non illi tamen, eximiâ quamvis atque præstanti naturâ, non est humano consilio, sed Deo Optimo Maximo referendum acceptum, quòd veram denique Religionem inierit, quòd tanto Principe ad Nos recepto, tanta Romanæ Ecclesiæ sit facta laudis atque utilitatis accessio. Deus enim, Deus, eam illi mentem injecit, ille volenti prætulit faces, adumbratasque jam veritatis intelligentias evolvit atque enudavit, & ab immani superstitione, quam furor cæcus & corporis indulgentia & obsequium immisit in mentes hominum, ad purissimam nostræ Fidei disciplinam traduxit, illumque cum potestate Christi Vicaria, quæ nunquam fallax est veritatis interpret, quæ morum vindex & castigatrix, stabili nexu reconciliavit. Quis persequi aut exæquare dicendo possit jucunditatem lætitiæ, quæ universam Ecclesiam, quæ Gentes & terras omnes ab illa stantes,



(VIII.)

tes, tam exoptato nuncio pervasit. Vos ego testes appello Manes atque Umbræ præcorum Saxonum, & Vos Cælestes immortalesque Mentis & Genii, qui salutare atque præsentis estis Provinciæ, cui post acerba illa tempora nullus aut lætior dies aut felicitior unquam illuxit, nullus, qui magis acceptæ cladis damna pensaret. Ipsa Templorum veterum simulacra, Aræque ipsæ Sacrorum, quanquam aut exturbatæ, aut everstæ, se commovisse e ruinis, atque gestire sunt visæ. Tu verò, quam gratulatus es Tibi, maxime Leopoldo Cæsar Imperator, cum id contigerit tandem, quod votis omnibus es precatus, cujus Tu author consilii fueras, ut ad Romanam Ecclesiam se recepisset Augustus, quem grato animo, quem insigni benevolentia prosequeris. Ejus Tu nempe fidem atque virtutem expertus, cum nemo unquam Tibi hostis fuerit, quem non & ille suscepit, in quem ab illo vel copias, vel comitatus, vel ipsam dexteram cum capitis etiam sui devotione, desideraveris. Quorum egregium illud commemorabo non in Te meritum tantum, sed in Christianam Remp. quod cum duobus & difficillimis quidem bellis impediretur, venire non recusavit Augustus in societatem periculi atque fortunæ, & magnâ lætissimâque suorum manu auxilio in Turcas adductâ Tibi, quanquam alieno loco apud Temesiam congressus, ita pugnavit, ut ingenti prælio hostes fuderit, & bene feliciterque re gestâ totam Pannonici Belli rationem prope explicarit, & magnâ Te parte metus atque discriminis liberarit. Quod si Romanos accepimus ob tot virtutum imagines eam & armorum felicitatem & Imperii amplitudinem consequutos, cur etiam præclaras illas excellentesque virtutes, quas in Augusto Religionis accessio perfecerat, Regio titulo remuneratas auctasque fuisse a Deo non putemus, præsertim cum id in Regnum fuerit evocatus, quo nullum benignæ illius atque præstanti naturæ posset accommodatius effingi? Polonorum, qui quondam Sarmatæ, Gens bellicosa & magnanima, Regiones obtinens fertiles & æquissimas, longè latèque porrectas, sita videtur esse propè divinitus in Christiani Imperii limitibus  
ad



(IX.)

ad propulsandam barbariem: Ea libertatis & gloriæ cupida jus illud, quod est initio omnibus inditum a natura facultatemque Reges sibi adsciscendi retinuit, illis in accipiendo Regno veluti nexu obligatis & recipientibus, ne quid aut gentis Religio aut Resp. aut leges deminuantur, immutenturve, & detrimentum accipiant. Suprema Regi juvandæ gentis potestas. Dignitates, Imperia, Provincias & Magistratus distribuendi impartiendi jus & arbitrium. Regale nomen ut prorsus invidiâ vacet, de Civium capite ac de fortunis judicium apud Senatum. Comitia Regi creando aguntur in campo. Equites, qui Poloniæ quamplurimi, in armis & centuriatim suffragia ferunt; Plebs nullo in numero habetur, utpote quæ universa Mancipi est. Candidati Regno petendo tota ex Europa concurrunt, qui Stirpe, qui opibus, qui belli gloriâ maximè florent. Erant tum plurimi & apud illos gratiosi, nominis famâ, liberalitate, imaginibus. Sed vicit Augusti virtus, & pervagata de ejus in gratiam reditu cum Ecclesia non anceps vulgi rumoribus, sed comprobata gravissimis testimoniis, sed certa fama, quæ cum ad ejus commendationem accessit, confederê illæ turbidæ Comitiorum undæ & procellæ, illumque ad Regnum obsecundantes tulerunt. In provincia nimirum finitima, & penè in oculis universæ Poloniæ, erant quasi divinitus ad hoc positæ, ut spectarentur, ut sui mirabiles excitarent amores, Augusti summæ virtutes, facile ac mite ingenium, animus & benignus & liberalis, morum elegantia & suavitas, regalis & sumptuosa magnificentia, in pace æquitas, in imperio modestia, in bello vis, & alacritas, erat &, quæ multum valet ad conjecturam virtutis, ea species oris & dignitas, ea corporis & membrorum habitas atque robur, ut vel ex illa primæva gentium ratione, quâ iis potissimum deferrebat imperium, qui formâ præstantes essent, & viribus editiores, facile salutatus esset in Regem. Spes in Augusto magna & momentum erat ad rem gerendam adversus Turcas, ducere in quos exercitum, quos ipse manu congressus in fugam vertere & profligare jam consueffet, quod illi tantam finitimos apud Barba-

(X.)

Barbaros auctoritatem consciverat , ut , cum in Regnum adveniret , statim rapinis & excursionibus temperarint , pacem rogarint , & conditiones acceperint . Atque utinam in illos potius , quos alia in tempora reservarat ad poenam , ut inclytæ & memorandæ voces testantur , quibus , cum diadema imponeretur , professus est , aut se moriturum , aut Kaminiekum ex hostibus recepturum , in illos , inquam , cogitationes & armorum vim convertisset potius , quàm sibi conatu infausito recuperandam a Sueca gente Livoniam proposuisset . Quod re vera ita bellum administravit Augustus , ut ea præclara rerum gestarum initia , vi captæ Urbes , in potestatem prope redacta Provincia , non ejus felicitati , at virtuti , extrema verò , quæ in Polonia acciderunt ejus non culpæ , at fortunæ sint tribuenda . Animus horret mihi , Oratio refugit , a memoria cladis illius , quam certè dissimularem , si non silentio prætereunda simul tunc esset ea laudum seges , quas excitavit illa calamitas , in quam si virtus non offendisset Augusti , tantam non illi gloriam , non tantam nobis admirationem ingereret . Spiritus enim Regios Majestatemque in afflictis & miseris illis rebus ita retinuit , ut tunc ediderit maximum atque admirabile celsi moderatique animi exemplum , quod potuisse confirmat Romanos homines eâ virtute inveniri , quantâ memoriæ proditum est . Augustus enim , cum habuisset in potestate , impetu quodam cæco temeritatis ad se delapsus , hostem superbum atque insultantem victoriâ , quicum de Regno ac de capite dimicaret , a quo durissimas condiciones subjerat , cujus inaudita prope consilia non Provinciæ , non Regna , capere poterant , non illum per vim oppressit , non intercept , non captivum retinuit , ut saltem ad omnia cogeret , quæ violato atque offenso collibuisse , sed quem in acie atque in pugna ad mortem insectabatur , ab illo in id se præbente , manus abstinuit , hospesque , ut hospiti , dexteram inimico porrexit . Tantam non dico fidem , sed excellentiam virtutis , ipse cum se receperit e periculo Suecorum Rex admiratus , etsi victor , & fortunatus , & maximis rebus gestis  
magni

magni excelsique animi gloriâ, sensit a calamitoso Rege se victum. Oh terram illam beatam, quæ talem Principem habuit, ingratham, quæ desiderium illius, miseram, quæ discessum sustinuit, fortunatissimam, quæ recepit amissum. Testis Polonia, quæ studio maximo consensuque omnium ordinum, atque ætatum, obviam visa est effundi, ut redeuntem amplecteretur Augustum, ut humeris penè suis reportaret in Regni Sedes. Ille verò ita lenem & moderatum se præbuit, ut ejus in Regnum reditu nemo sit civis desideratus in universa Polonia, nisi qui concidisset in acie. Omnes enim, qui vel in illum nefaria tela sumpserant, vel conjurassent, vel defecissent ad hostem, quique eo reverso civilis belli rationem propè solutam expeditamque turbassent, non modò veniam sunt consequuti, sed & benigne & amanter excepti, & honoribus cumulati ab illo, nihil præter injurias obliviscente, cujus misericordia, non lacrymis evocanda, non precibus, ipsa calamitosus atque supplicibus occurrebat. Tantæ benignitatis adspectu fluxerunt arma de manibus, conjurationis enses delapsi, omnium sunt animi deliniti, quodque ægrè vis præstitisset, effecit beneficentia, cujus in voluntates imperium & dominatus, & latius patet, & firmior est, quàm timoris, qui se potentia nec fidum præbet nec diuturnum custodem. Quod si nullâ re propius ad immortalem atque divinam naturam accedunt Reges, quàm salute hominibus dandâ, si misericordia, si lenitas, eam a Deo gratiam ineunt, ut illum Nobis placabiliorem efficiant, amplissimos certè fructus capiet Augustus ingenii sui, cui nihil tam usitatum, quàm parcere, nihil tam popolare, quàm gratiâ frangere inimicitias, & beneficiorum vinculis obligare. Harum affines in illo erant & tanquam sociæ virtutum liberalitas & magnificentia. Natos in copia Reges atque in fortunis rectè putabat Augustus, ut opes, ut Regni quæstus ab illis in omnem populum dimanarent. Ejus inaudita atque immensæ pecuniarum effusiones, militaria spectacula, data exercitibus epula, splendida hospitia, testantur animi magnitudinem, qui Regnum sibi non




(XII.)

non fructuosum, verum se ipsum Regno, maximo in fructu esse gloriosum existimabat. Extant æterna illius benefacta in universam Saxoniam, erectæ artes, instaurata gymnasia, amplificatum commercium, vectigalium ita res constituta, ut sine Gentis querela magnos exercitus alere continenter potuerit. Extat Religio, quâ nullum divinius bonum intulit Genti, extant Ecclesiæ Ritus, & Cœremoniæ Sacrorum, quas abjectas & exulantes restituit, dedicatisque publicè Templis ornavit. Quo verò obsequio, quâ fide Romanos ille Pontifices observavit, integer ejus vitæ Regnique cursus demonstrat, quem demum ita peregit, ut in extremo spiritu optimum & Christianum verè se Regem profiteretur. Quæ igitur tanta mihi dicendi vis, ut laudationem absolvere? Quæ Polonis, & quæ Saxonibus, tantæ sufficient lacrymæ, ut funus prosequi possint, & desiderium Augusti, in quo defecit Ecclesiæ maximum ornamentum, defecit illis magnanimi & summi Regis exemplum? Id unum restat, ut ad Te mea se convertat & Te compellet Oratio, egregie Princeps, Augusti Fili, qui non avitum tantum Imperium in Saxones & dignitatem a Patre, sed gloriam amplificati etiam nominis accepisti, & paternarum virtutum imagines in Te referens, magnam de Te susceptam expectationem sustentas. Paternæ Tu voluntatis in Religionem amplissimum testimonium, Tu beneficium exhibes Nobis, quo nullum Augustus contulit in Ecclesiam præstantius. Fatalis enim cum inhæreret illi in Te macula superstitionis ab incunte ætate concepta, quæ si penitus insideret atque adolesceret, heu quantam virtutis indolem, quantam spem oppressisset, in id enixè contendit optimus Pater, ut illa ex animo tuo deletâ abstersâque, geminâ Te donaret & Religionis & vitæ luce. Quantas in id incumbens difficultates incurrit, cum Tibi depravatores adolescentiæ submovit, institutores ad veritatem præfecit, cum e complexu Te Genitricis avulsum, Regali procul emisit e domicilio, ut Urbes Catholicorum Regum obires, mores inviseres, & magna famâ, magnâ apud omnes benevolentiam excitatâ,



(XIII.)

citatâ, in hac demùm Italiæ luce, repudiatis erroribus, & sanctissimam Religionem complexus, amantissimum Patris & Tui Pontificem illum maximum tam exoptato reditu in gratiam consolareris. Quæ verò magna & excelsa sibi de Te pollicitus ille est, ea maximus nunc expectat & sapientissimus Pontifex Clemens XII., qui universam Saxonum Gentem suæ voluntatis insignibus monumentis ornavit, qui summâ Te benevolentîâ prosequitur, qui Genitori parentans, ut a dolore se recreet, cogitationes in Te defigit, atque in Te spectat, in quo Polonia Patris imaginem, in quo Saxonia virtutem, in quo Religio præsidium, in quo denique habemus omnes, unde possimus magnanimi & præstantissimi Regis intempestivâ morte Nobis inultam acerbiteratem & desiderium lenire.



R O M Æ

Apud Jo: MARIAM SALVIONI Typographum VATICANUM.

M DCC XXXIII.

---

*Superiorum Permissu.*

1233

94-B  
18813

THE GETTY CENTER  
LIBRARY



